

Шеърят анжумани

Республикаимизда Қозоғистон Республикасининг Ўзбекистондаги элчихонаси, Қозоқ Миллий маданий маркази мутахассислари билан ҳамкорлик ишлари йўлга қўйилган бўлиб, ўтган йиллар мобайнида таълим соҳасида бир қатор анжуманлар, илмий-амалий семинарлар ўтказилди ва ўтказиб келинмоқда. Таълим қозоқ тилида олиб бориладиган мактабларда қозоқ тили ва адабиёт фанларининг долзарб муаммоларига бағишланган ўтказилган республика ва ҳудудий семинарлар шулар жумласидандир.

Жорий йилнинг 8-9 апрель кунлари Буюк соҳибқирон Амир Темур таваллудининг 680 йиллиги муносабати билан Республика қозоқ маданий маркази томонидан республикаимиздаги “Аброр Хидоят” номли драма театрида “Шеърят анжумани” ўтказилди. Анжуманга Жанубий Қозоғистон Республикасидаги вилоят ўзбек драма театри санъат усталаридан Миркамол Заббархонов, Клара Шодибекова, Венера Нишонбоева, Савринисо Рўзиметова, Улуғбек Носиров, Зарина Қодирметова, Жавлон Сайитов, Акбар Эрхоновлар ташриф буюрдилар. Шунингдек, қозоғистонлик шоирлардан, Ўзбекистон халқ шоири Махмуд Тоир, Мирпўлат Мирзаев, Ўзбекистонда яшаб ижод қилиётган қозоқ шоири, ёзувчи, академик Қалдибек Сейданов, шоир Абдулла Рустамов, Республика қозоқ маданий маркази раиси Серикбай Усеновлар иштирок этдилар.

“Шеърят анжумани”нинг биринчи кунида юқорида номлари қайд этилган шоир ва ёзувчилар, санъат усталари томонидан улуғ бобокалонимиз, буюк соҳибқирон Амир Темур ҳақида, Ватан, республикаимиз мустақиллигига бағишланган шеърлар ўқилди. Тадбирни Ўзбекистон халқ шоири Махмуд Тоир олиб бориб, Амир Темурнинг ҳаёти ва ижоди билан боғлиқ қизиқарли маълумотларни ўзининг мазмунли шеърлари билан уйғунлаштириб олиб борди. Сўнг Ўзбекистон Ёзувчилар уюшмаси аъзоси, шоир Мирпўлат Мирзаев, шоир Абдулла Рустамов, Низомий номидаги Тошкент Давлат педагогика университети ўзбек ва қозоқ филологияси кафедраси талабаларининг шеърлари тингланди.

Анжуманнинг иккинчи куни Жанубий Қозоғистон вилоят ўзбек драма театрида драматург А.Ўразбековнинг биринчи бор ўзбек тилига таржима қилиниб саҳналаштирилган “Ёлғиз олма дарахти” асари Жанубий Қозоғистон вилояти ўзбек драма театри санъаткорлари иштирокида намоиш этилди. Драмада фарзандларини отасиз, ёлғиз тарбия қилган онанинг тақдири, ота ўрнини босиш осон кечмаслиги ҳикоя қилинган бўлиб, болаликдан ногирон кенжа ўғил Мақсад ўз жигарларининг мурасиз тортишувларини кўтара

олмай, жонига қасд қилиши манзаралари жуда таъсирли баён қилинган. Театр тугагач, драматург А.Ўразбеков ҳамда ижрочи санъаткорлар билан ўзбек драма театри санъаткорлари ўзаро тажриба алмашишга муваффақ бўлдилар. Улар ўз чиқишларида бундай тадбирларнинг мунтазам ўтказиб турилиши икки республика ўртасидаги ўзаро ҳамкорлик ишларини янада мустаҳкамлашга ёрдам беришини таъкидлаб ўтдилар. Тадбир сўнгида Ўзбекистон ва Қозоғистон Республикаларидан қатнашган меҳмонларга ҳар икки республиканинг вакиллари томонидан эсдалик совғалари тақдим этилди.

Г.Нишонова, РТМ Филология
фанлари бўлими Бош методисти